

Brambles

Belastingbeleid

Hersien: 29 Junie 2021

Weergawe 4,0

Inleiding

Brambles se gedragskode verskaf 'n etiese en regsraamwerk vir alle werknemers. Ons belastingbeleid stem ooreen met die beginsels van die gedragskode en geld wêreldwyd vir Brambles-ondernemings.

Brambles is daartoe verbind om aan belastingwetgewing te voldoen, en om eerlike, konstruktiewe verhoudings met belastingowerhede te hê. Belastingwette is inherent kompleks. Brambles probeer om aan wette te voldoen deur die regte hoeveelheid belasting in die regte jurisdiksie te betaal, toepaslike inligting bekend te maak, en steun en aansporings te benut indien dit beskikbaar is. Ons ondersteun groter deursigtigheid van maatskappye se belastingbetalings en -prosesse om sodoende openbare vertroue op te bou, en het die vrywillige kode vir belastingdeursigtigheid (Voluntary Tax Transparency Code) van die Australiese raad op belasting (Australian Board of Taxation) aanvaar.

Ons betaal korporatiewe inkomstebelasting, doeanebelasting, werknemersbelasting en ander belasting. Daarbenewens samel ons werknemersbelasting in en betaal dit. Dit geld ook vir onregstreekse belastingsoos verkoopsbelasting en BTW. Die belasting wat ons betaal en insamel, vorm 'n belangrike deel van die ekonomiese bydrae tot die lande waarin ons bedrywig is.

Ons verbintenis is gegrond op die volgende beginsels:

1. Belastingrisikobestuur en -bestuursraamwerk

Ons volg Brambles se raamwerk vir risikobestuur as deel van ons interne beheerprosesse. Ons identifiseer, evalueer en bestuur belastingrisiko's en bring dit toepaslik in berekening. Ons implementeer risikobestuursmaatreëls soos beheermaatreëls oor die volgende risiko's:

- Bedryfs- en transaksierisiko's – die risiko van onvoldoende belastingbepaling, -kundigheid en -berekening in saketransaksies, en swak implementering of bestuur van sleutelrisiko's, waaronder onvoldoende dokumentasie om geneemde besluite te ondersteun. Sleutelbeheermaatreëls sluit in dat die belangrikste funksionele areas (waaronder die groepsbelastingafdeling) finale besluite volgens 'n goedkeuringsraamwerk neem;
- Voldoeningsrisiko – die risiko van laat of onakkurate belastingopgawes. Sleutelbeheermaatreëls sluit in 'n sentrale databasis wat die indiening van belastingopgawes monitor, en die gebruik van eksterne ouditeursfirmas om sodanige opgawes op te stel of te kontroleer;
- Belastingrekeningkundige risiko – die risiko van wesenlike finansiële wanverklaring soos in die tersaaklike rekeningkundige standaard gedefinieer word. Sleutelbeheermaatreëls sluit in om belastingrekeningkundige instruksies aan opstellers van finansiële state te voorsien, en om wesenlike belastingsaldo's deur die groepsbelastingafdeling te laat nagaan en finale besluite daarvoor te neem, en
- Eksterne en bestuursrisiko – die risiko wat verband hou met nuwe wetgewing en die bestuur van die belastingfunksie. Sleutelbeheermaatreëls sluit in om te verseker dat toepaslike beleide en prosedures reg oor die wêreld bestaan, in stand gehou word, en konsekwent gebruik word, en dat die wêreldwye belastingspan die vaardighede en ervaring het om die benadering gepas te implementeer.

Wesenlike belastingkwessies en -risiko's word, wanneer geïdentifiseer, aan Brambles se ouditkomitee en die direksie bekendgemaak.

2. Vlak van risiko in verhouding met belasting wat Brambles bereid is om te aanvaar

Die doeltreffende bestuur van risiko, waaronder belastingrisiko, is noodsaaklik vir die voortgesette groei en sukses van Brambles. Ons inkorporeer doeltreffende risikobestuur as deel van ons sakeprosesse. Brambles het interne beheermaatreëlstelsels en risikobestuursprosesse ontwerp en geïmplementeer, waaronder dié wat toepaslik is vir belastingrisiko, en dit is deur die direksie nagegaan.

Interne bestuursprosedures het 'n uitwerking op aanvaarbare risikovlakke deur:

- Risikokwessies, waaronder belasting, op 'n konsekwente manier en met gemeenskaplike metodes te identifiseer, te ontleed en te gradeer;
- Ons risikotoleransie vir belastingkwessies 'n belangrike oorweging tydens ons besluitneming te maak; en
- Goedkeuring deur senior bestuur of die direksie te vereis vir transaksies, volgens 'n goedkeuringsproses wat die vlak van risiko en wesenlikheid van die betrokke gevolge in ag neem.

Ons voldoen aan tersaaklike belastingwetgewing en probeer die risiko van onsekerheid of geskille verminder. Vir wesenlike transaksies soek ons sekerheid, byvoorbeeld deur eksterne advies en regsopinie te verkry of 'n ooreenkoms met belastingowerhede te bereik waar wetgewing onseker of ingewikkeld is.

3. Belastingstrategie en -beplanning

Brambles se gedragskode bepaal dat alle sakebedrywighede uitgevoer moet word in ooreenstemming met die wetgewing en regulasies van die land waar die onderneming geleë is. Ons belastingstrategie en -beplanning ondersteun ons sakestrategie en weerspieël kommersiële en ekonomiese aktiwiteit. Toepaslike Brambles Groep-belanghebbendes, onder wie Brambles se direksie, die uitvoerende hoof, die finansiële hoof, en kommersiële, regs-, tesourie- en rekeningkundige hoofde, is betrokke, volgens 'n goedkeuringsproses wat die vlak van risiko en wesenlikheid van die betrokke gevolge in ag neem, om te verseker dat transaksies aanvaarbaar is.

Ons voer transaksies tussen groepmaatskappye op 'n armlengtegrondslag uit en in ooreenstemming met OECD-riglyne oor oordragprysbepaling.

Brambles probeer nie belasting ontduik deur kunsmatige reëlings, of belastingtoevlugsoorde, te gebruik wat geen sakedoel het nie.

4. Benadering tot belastingowerhede

Ons streef daarna om verhoudings met regerings en fiskale owerhede op te bou en in stand te hou wat konstruktief is en op vertroue en wedersydse respek gegrond is. Brambles voldoen aan die belastingwetgewing in elke land, maar indien onakkuraatheid voorkom, sal Brambles dit vrywillig aan belastingowerhede bekendmaak.

Ons werk proaktief en deursigtig met fiskale owerhede met die doel om geskille te verminder en om betyds eenstemmigheid te bereik oor enige areas waaroor ons verskil, waar dit ook al moontlik is. As deel van ons benadering tot geskiloplossing neem ons alle regmatige middels in ag, waaronder arbitrasie, wedersydse eenstemmigheid en waar dit gepas geag word appèlprosedures om sekerheid oor belastingbehandeling te verkry.

Ons kommunikeer met regerings en hul verskillende liggame oor die ontwikkeling van belastingwetgewing, en die toepassing daarvan, hetsy regstreeks of deur handels- en ander soortgelyke verenigings, soos toepaslik. Ons benadering word getoon deur 'n stewige belastingsbeheerraamwerk, ons gedrag en word gesteun deur ons laerisikoverhoudings met belastingowerhede, waaronder die Australiese belastingkantoor en Haar Majesteit se inkomste- en doeanedepartement.

5. Rolle en verantwoordelikhede

Die volgende tabel verskaf 'n oorsig van die rolle en verantwoordelikhede vir die bestuur van belastingrisiko's binne die Brambles-groep:

Rol	Verantwoordelikheid
Brambles se direksie	Brambles Limited se direksie is verantwoordelik daarvoor om die groep se risikoptyt en sy raamwerk vir risikobestuur daar te stel, en om oor stelsels van interne beheer toesig te hou, waaronder die goedkeuring van die belastingbeleid.
Ouditkomitee	Die ouditkomitee staan die direksie by in die vervulling van sy verantwoordelikhede oor korporatiewe bestuur en oorsig, waaronder die doeltreffendheid van die bestuur van die groep se wesenlike risiko's, insluitende belastingrisiko's.
Finansiële hoofbeampte (FHB)	Die uitvoerende hoofbeampte se vernaamste verantwoordelikheid is risikobestuur, terwyl die FHB hoofsaaklik daarvoor verantwoordelik is om Brambles se finansiële risiko's, waaronder belastingrisiko's, te bestuur. Die aanmelding van hierdie risiko's by die ouditkomitee en Brambles se direksie vorm deel van die halfjaarlikse verslag aan hierdie onderskeie liggame.
Groepvisepresident, belasting (Groep-VP, belasting)	Die groep-VP, belasting, is verantwoordelik vir die ontwerp van die belastingbeleid en die raamwerk vir belastingrisikobestuur, en om te verseker dat gepaste prosesse en beheermaatreëls gehandhaaf word en om spesialissondersteuning te verskaf.
Streeksvisepresidente, belasting (streeks-VP's, belasting)	Die streeks-VP's, belasting, en hul spanne is verantwoordelik om op streeksvlak voldoening aan die belastingbeleid te verseker, die raamwerk vir belastingrisikobestuur te handhaaf en om spesialissondersteuning aan die streeksake-eenhede te verskaf.
Groep- finansiële beheerder	Die groep- finansiële beheerder is verantwoordelik om voldoening aan plaaslike wette en regulasies te monitor en uitsonderings soos laat ingediende opgawes twee keer per jaar by die ouditkomitee aan te meld.
Streeks- finansiële beheerders	Streeks- finansiële beheerders is verantwoordelik vir die voldoening aan plaaslike wetgewing en belastingbeleid op entiteitsvlak, van die verwerking van transaksies tot die aanmelding en indiening van belastingkennisgewings en -opgawes met ondersteuning van eksterne adviseurs en die streeks-VP, belasting, soos dit gepas is.
Interne oudit	Interne oudit is daarvoor verantwoordelik om beheermaatreëls te toets en bevindinge aan te meld. 'n Beskrywing van die beheermaatreëls sal as deel van die ouditprogram onderhou word.

6. Wetgewende vereistes van Brittanje

Hierdie dokument word gepubliseer in ooreenstemming met paragraaf 19(2) van skedule 19 van die Wet op Finansies, 2016 (Finance Act 2016), vir die finansiële jaar geëindig op 30 Junie 2021.

7. Goedkeuring deur die direksie

Die belastingbeleid is op 29 Junie 2021 deur Brambles se direksie goedgekeur.